

# Акафист

## Святителю Иоанну Шанхайському и Сан-Францискому

### Кондак 1

Избранный чудотворче и изрядный угодниче Христов, всему миру источаяй обильныя струи духовнаго наставления и дивных чудес множество, восхваляем тя с любовию и зовем ти: Радуйся, святителю отче Иоанне, в бедах скорый помощниче.

### Икос 1

Ангела образом яви тебе в последняя времена всяя твари Создатель, да с Материю Божию печешся о людех земных. Взирающе же на добродетели твоя, преблаженне Иоанне, вопием ти сице: Радуйся, с раннего детства благочестием украшенный. Радуйся, иже со страхом и трепетом волю Божию исполнивый. Радуйся, иже явивый благодать Божию в тайных благодеяниях. Радуйся, быстрое далече сущих страждущих услышание. Радуйся, любвеобильное поспешение ближним своим во спасение. Радуйся, радование всем с верою к тебе припадающим. Радуйся, святителю отче Иоанне, в бедах скорый помощниче.

### Кондак 2

Видяще обильное добродетелей твоих излиание, святителю славный Иоанне, просвещаемся духом, яко живоносный источник чудес Божиих напаяеши нас, верно вопиющих к Богу: Аллилуиа.

### Икос 2

Разум имеяй преисполненный любве, купно и богословия, богомудре Иоанне, и богопознанием умудренный, и к страждующим людем любовию украшенный, познавати истиннаго Бога нас научи, да и мы во умилении вопием ти: Радуйся, непоколебимая твердыне истины православия. Радуйся, драгоценный сосуде Духа Святаго. Радуйся честный обличителю неверия и лжеучения. Радуйся, ревностный исполнителю заповедей Божиих. Радуйся, подвижниче не даяй на ложе себе отдохновения. Радуйся, возлюбленный пастырю стада Христова. Радуйся, святителю отче Иоанне, в бедах скорый помощниче.

### Кондак 3

Силою благодати Божия благий сиропитатель и наставник юношам явился еси, воспитуя в страхе Божиим и приуготовляя их к служению Богу. Сего ради чада твоя взирают на тя и благодаряще вопиют Богу: Аллилуиа.

### **Икос 3**

Имеяше воистинну, отче Иоанне, с небесе тебе песни воспеваемой быти, а не от земли: како бо кто от человек возмогл бы твоих дел величие проповедати; мы же, приносяще Богу, яже имамы, вопием ти сице: Радуйся, непрестанною молитвою покрываяй чада твоя. Радуйся, охранителю стада твоего крестным знаменем. Радуйся, любви великия вместилище, не взираяй на языков различия. Радуйся, святильниче всесветлый и вселюбимый. Радуйся, образе молитвы непрестанныя и милосердия. Радуйся, утешений духовных подателю требующим. Радуйся, святителю отче Иоанне, в бедах скорый помощниче.

### **Кондак 4**

Бурею напастей одолеваемы: како достойно возможем восхвалити чудеса твоя, блаженне Иоанне; яко прошел еси до конец вселенныя, спасения ради паствы твоя и благовествования Евангелия сущим во тьме. Благодаряще же Бога за апостольския труды твоя, воспеваем Ему: Аллилуиа.

### **Икос 4**

Слышаша ближнии и дальнии величие чудес твоих, Божию Материю даже до нашего времени являемых, темже в тебе Богу прославляющемуся дивящесе, в страхе вопияху: Радуйся, просветителю сущих во тьме неверия. Радуйся, приведи людей твоих с востока дальняго до запада. Радуйся, источниче чудес изливаемых Богом. Радуйся, в любовь вразумляй заблуждающих. Радуйся, скорый утешителю кающихся о гресех своих. Радуйся, потевождю грядущих путем правым. Радуйся, святителю отче Иоанне, в бедах скорый помощниче.

### **Кондак 5**

Богодарованный свет явился еси, бури всех лютых разгоняй, сущих на острове от вихрей смертоносных молитвами твоими охраняй, святителю Иоанне, и крестным знаменем ограждай. Научи и нас, призывающих тя в помощь, чудотворче святой, к Богу со дерзновением взывати: Аллилуиа.

### **Икос 5**

Видим многую помощь твою в напастех и обстояниях, преблаженне отче Иоанне, дерзновенный бо ходатай пред престолом Божиим и скорый в бедах помощник еси. Того ради и мы на твое предстательство пред Богом уповаем и вопием ти: Радуйся, стихий опасных прогонителю. Радуйся, молитвою твоею от нужд избавляй. Радуйся, алчущим хлеба присный подателю. Радуйся, приуготовляй просящим изобилие. Радуйся, утешителю в скорбех сущих.

Радуйся, многих падших от погибели исхитивый. Радуйся, святителю отче Иоанне, в бедах скорый помощниче.

### **Кондак 6**

Проповедуя спасение, яко новый Моисей гугнивый явился еси, изводя люди твоя из плена безбожных, преблаженне Иоанне. Избави и нас от работы греховных и врагов невидимых, да радуешься вопием к Богу: Аллилуиа.

### **Икос 6**

Возсияв праведностью твоею, совершил еси неисполнимое, о добрый пастырю: преклонил бо еси власти мирския сострадати о людех твоих. Того ради с ними купно и мы благодарственно вопием ти: Радуйся, пастырю добрый, пастве твоей, пресельником, тихое пристанище уготовавый. Радуйся о детех и болящих наипаче попечение имевый. Радуйся, усердно ты призывающим верно помогаяй. Радуйся, яко в немощнем телеси твоём сила Божия независтно совершашеся. Радуйся, оразителю нападения нечестивых. Радуйся, помрачителю лжи и проявителю истины. Радуйся, святителю отче Иоанне, в бедах скорый помощниче.

### **Кондак 7**

Хотя достойно прославити древних святых Запада, отпадшаго от истины, восстановил еси почитание их в Церкви Православной, о любителю святых Востока и Запада. Днесь с ними на небеси моли о нас, поющих на земли: Аллилуиа.

### **Икос 7**

Новаго видим тя избранника Божия, иже вкупе со святители древния Галлии явился еси в последняя времена яко един от сих, вдохновляя паству твою соблюдать православную веру, якоже же сии на Западе исповедаху. Сохрани и нас в вере сей пребывати, вопиющих ти: Радуйся, новый Мартине в воздержании, подвизах и чудесех твоих. Радуйся, новый Германе во исповедании твоём православных веры. Радуйся, новый Иларие в божественном богословии. Радуйся, новый Григорие в почитании и прославлении угодников Божиих. Радуйся, новый Фаусте иноческим усердием. Радуйся, новый Кесарие в твердой любви ко правилу церкви Божии. Радуйся, святителю отче Иоанне, в бедах скорый помощниче.

### **Кондак 8**

Странное видение предста ти: в земли новой встретил еси паству твою бывшую, смущаему скорбями многими, но яко дивный пастырь наставил еси ю поучением, терпением и праведностью твоею, и церковь Божия Матере, яже

всех скорбящих Радость есть, воздвигл еси: мы же удивляющесе терпению и смирению твоему, благодарно вопием к Богу: Аллилуиа.

### **Икос 8**

Всего себе предав Христу, был еси делатель винограда Его, богоносне отче, не ведал бо еси покоя до конца многострадального живота твоего. Помози и нам недостойным в деланиих наших и в нашем прилежании в верности Христу, да славяще, вопием ти: Радуйся, претерпевый до конца и достигший спасения. Радуйся, пред иконою Богоматери умрети сподобивыйся. Радуйся, посреде гонения несправедного мужественный правды хранителю. Радуйся, совершивый служение свое до конца и кончину приемый седа, яко иерарх. Радуйся, по смерти утешивый паству чудесным своим возвращением. Радуйся, многих чудес подателю к раце твоей с верою и любовью притекающим. Радуйся, святителю отче Иоанне, в бедах скорый помощниче.

### **Кондак 9**

Все естество ангельское восхождением твоея души в небесныя обители возрадовашася, мы же удивляющесе твоим чудесем на земли, действием Святаго Духа являемым, воспеваем Богу: Аллилуиа.

### **Икос 9**

Ветии многовещаннии не возмогут изобразити по достоянию строгости жития твоего, о праведне отче Иоанне, понеже дом благодати неизреченнаго Бога был еси, мы же не можем умолчати, чудеси явлену нашему маловерному веку дивящесе, и прославляем тя сице: Радуйся, божественных наставлений палато. Радуйся, яко смиренным деланием ангелы сослужители себе сотворивый. Радуйся, обретый вечное и нерукотворное жилище на небесех. Радуйся, врачевнице, в нейже всяк недуг от Бога врачуется. Радуйся, молитвеннаго подвига хранилище. Радуйся, освященный храм Духа Святаго. Радуйся, святителю отче Иоанне, в бедах скорый помощниче.

### **Кондак 10**

Спасти хотя мир, иже всех Спаситель, новаго святаго посла нам, и чрез него из темных глубин греховных воззва ны. Слышаше же его нас призывающа, мы недостойнии взываем к Богу: Аллилуиа.

### **Икос 10**

Стена еси всем прибегающим к твоему небесному заступлению, отче Иоанне, темже и нас от демонских нападений ограждай, в бедах и нуждах, стужающих нам на земли помогай, да с верою тебе взываем: Радуйся, ослепших прозрение. Радуйся, силою молитвы жизнь на смертном одре сущим подаваяй. Радуйся, богооткровенное вразумление в смятении и сомнениях сущим.

Радуйся, спасительная благо, орошающая в знойной печали погибающих.  
Радуйся, сирым и оставленным отеческое заступление. Радуйся, святой  
учителю ищущих истины. Радуйся, святителю отче Иоанне, в бедах скорый  
помощниче.

### **Кондак 11**

Пение непрестанное ко Пресвятей Троице, преблаженне отче Иоанне, мыслию,  
словом и доброделанием принесл еси: многим разумением истинныя веры  
Божия повеления уяснил еси верою, надеждою и любовью наставляя нас в  
Троице Единому Богу воспевати: Аллилуиа.

### **Икос 11**

Светодательна светильника православия сущим во мраце неведения зрим тя,  
стада Христова добрый пастырю. Тако и по успении твоём являеши истину  
неведущим ея, просвещая души верный, вопиющих ти таковая: Радуйся,  
просвещение мудростию Божиею сущих в неверии. Радуйся, радуге тихия  
радости кротких. Радуйся, громе, устрашая во гресе упорствующих. Радуйся,  
молние, ереси пожигающая. Радуйся, одождение догматов православия.  
Радуйся, орошение богомыслия. Радуйся, святителю отче Иоанне, в бедах  
скорый помощниче.

### **Кондак 12**

Благодать, данную ти от Бога ведающе, сию с благоговением и благодарностью  
приемлем, к заступлению твоему чудному притекающе, о всехвальне отче  
Иоанне, твоя же чудеса прославляюще, взываем е тебе: Аллилуиа.

### **Икос 12**

Поюще хвалу Богу, небесный сонм святых радуется, яко не остави Господь  
падший и безверный мир, но явил есть всемогущую силу свою на тебе, кротком  
и смиренном слугителе, о блаженне Иоанне, и мы со всеми святыми  
радующеся, чтим тя сице: Радуйся, новая звезда праведности, на небе  
возсиявшая. Радуйся, новый пророче, посланный пред конечным воцарением  
зла. Радуйся, якоже Иона о возмездие за грехи предрекий. Радуйся, якоже  
Креститель всех к молитве и покаянию призывавый. Радуйся, якоже Павел  
много терпевый ради Евангелия и проповедания веры. Радуйся Апостолу новый,  
своими чудесы вселяяй в нас благоговейный трепет и веру. Радуйся, святителю  
отче Иоанне, во бедах скорый помощниче.

### **Кондак 13**

О пресветлый и предивный угодниче Божий, святителю отче Иоанне, утешение  
всем в скорбех сущим, нынешнее наше молитвенное прими приношение, да

молитвами твоими от геены огненной избавимся и богоприятным твоим ходатайством сподобимся во веки воспевати Богу: Аллилуиа.

*(кондак сей глаголи трижды таже икос 1-й и кондак 1-й).*

### **Икос 1**

Ангела образом яви тебе в последнее времена вся твари Создатель, да с Материю Божию печешся о людех земных. Взвизывая же на добродетели твоя, преблаженне Иоанне, вопием ти сице: Радуйся, с раннего детства благочестием украшенный. Радуйся, иже со страхом и трепетом волю Божию исполнявший. Радуйся, иже явивый благодать Божию в тайных благодеяниях. Радуйся, быстрое далече сущих страждущих услышание. Радуйся, любвеобильное поспешение ближним своим во спасение. Радуйся, радование всем с верою к тебе припадающим. Радуйся, святителю отче Иоанне, в бедах скорый помощниче.

### **Кондак 1**

Избранный чудотворче и изрядный угодниче Христов, всему миру источая обильныя струи доховнаго наставления и дивных чудес множество, восхваляем тя с любовию и зовем ти: Радуйся, святителю отче наш Иоанне, последних времен чудотворче.

## **Молитва**

**О** святителю отче Иоанне, пастырю добрый и тайновидче душ человеческих! Ныне у престола Божия за нас молишися, якоже и сам посмертно изрек еси: аще и умрох, но жив есмь. Умоли Всещедраго Бога прощение нам во гресех даровати, да бодренно воспрянем, и Богу возопием о даровании нам духа смирения, страха Божия и благочестия во всяческих путех жизни нашея, яко милостивый сиропитатель и искусный наставник на земли быв, ныне буди нам путеводитель и в смутах церковных Христово вразумление. Услыши стенание смятенных юношей нашего лихолетия, обуреваемых беснованием вселукавым, и призри на уныние изнемогающих пастырей от утеснения тлетворнаго духа мира сего и томящихся в нерадении праздном, и ускори на молитву, слезно вопием ти, о теплый молитвиниче: посети нас сирых, по всему лицу вселенныя разсеянных и во отечестве сущих, но слабою любовию ко свету Христову влекущихся и ждущих твоего отеческаго наставления, да благочестию навыкнем и наследницы царствия небеснаго явимся, идеже ты пребываеши со всеми святыми, славяще Господа нашего Иисуса Христа, емуже честь и держава ныне и присно и во веки веков. Аминь.